

# INUIT ATAQATIGIIT

## Inatsisartuni



UKA 2020/imm. 35  
22. november 2020  
Mariane Paviasen

**Inatsisartut aalajangiiffigisassaattut siunnersuutigineqarpoq, Naalakkersuisut peqquneqassasut pisortanit ikiorsiissutit pillugit allannguuteqaqqullugit, taamaalilluni namminerisamik illuutillit aammalu inissianik piginneqatigiillutik pigisallit pisinnaatitaaffigilissagaat pisortanit ikiorsiissutinik ikiorneqarsinnaanngortillugit, kræfteqarlutik nappaateqarnertik ilutigalugu katsorsagassanngoraangamik nalinginnarmik akissarsionertik unikkallaraangat sulisinnaajunnaanertik pissutigalugu. Nalunaarusiami erseqqissarneqassaaq ajornartorsiut qanoq isikkoqarnersoq aammalu qanoq ikiortarialiunersut taamatut pisinnaatitaaffilissapata. Nalunaarusiaq UKA2021-mi saqqummiunneqassaaq**  
(Inatsisartunut ilaasortaq Erik Jensen)

Inatsisartunut ilaasortap Siumumeersup Erik Jensen-ip pisortanit ikiorsiissutit pillugit allannguuteqarnissaannut tunngasumik siunnersuuteqarsimaneranut Inuit ataqatigiinniit qujavugut imatullu oqaaseqarfiginiarparput.

Kikkulluunniit nunatsinni inuttunneqisumi pisinnaatitaaffii assigiiaarnissaat anguniarlugu sulissuteqartuariaqarpugut.

Nalunngilarput maanna namminerisamik illuuteqalersartut akileriikkamik amerlanerpaat tassaasut utoqqalisut ilaqarpugut inuusuttunik illuuteqalereersimasunik kisianni suli akilersuisunik pisortat piumasaat naapertorlugu nammineq sulilluni katersaqarluni illuutitaarsimanerup kingorna napparsimalersimagaanni kingunerisussaangilaa ikiorneqarsinnaannginneq, tamanna killormoortariaqarpoq.

Ikiortariallit tamaasa ikiornissaannut pisussaaffeqarpugut, tamanna takinerunanilu naannerunngilaq.

Siusinnerusukkut tusareerparput inuit peqqissuusimallutik inooriarlutik nappaateqalernermik kingunerisaannik innarluuteqalersimasut nammineq illuuteqaraangamik innarluutiminnut naleqquttumik illuutigisaminni allannguilaartussaattillutik allaat ikiorsiissutinik tunineqarsinnaaneq ajorneri, allaat illumut isertarfeerannguumut tunngagaluarpuunniit, tamanna ajorluinnartuuvoq nappaatip suulluunniit qaqugukkulluunniit takkuteratarsinnaanera tamatsinnut eqquisinnaasoq nalunngereerparput, ajorluinnartuuvorlu ikiorsiissutinut tunngatillugu assigiinngitsunik atugassaqaqtitaaneq.

Napparsimalersimagaanni Isertitaaruteriasaarnermik kinguneqartumik imaangilaq inuttut naleqassuseq pisinnaatitaaffiigaanermillu kinguneqassasoq, pisinnaatitaaffeqarpugut ikiortariaqalerutta ikiorneqartussaalluta.

Naalakkersuisut allannguutissatut siunnersuummini tunngavilersuutaat tassaasoq maanna ikiorsiissutinut aqqissuuseqqinnermi nutaamik aqqissuuseqqinnermut suliaqarnermi siunnersuut ilanngunneqarnissaanik naalakkersuisut peqquneqassasut.

Ajoraluartumik pisortanit ikiorsiisarnermut aqqissuusinnermik aqqissuuseqqinneq 2021-mi saqqummiussiumaartuinnarmik allassimapput, uani maluginiassavarput aqqissuuseqqinnermik oqariartuuteqarnerat aammalu ukioq saqqummiussivissartik kisiat allassimallugu oqariartuuteqarnerat.

Tamanna aallaavigalugu Inuit Ataqatigiinniit siunnersuummi allannguutissatut siunnersuutiginiarparput imaalillugu:

Innuttaasut sivisuumik napparsimaneq pissutigalugu nalinginnaasumik akissarsiaarukkallartut pisortanit ikiorsiissutit pillugit aaqqissuusseqqinnermut aamma suliffeqanngikkallarnemi ikiorsiissutit pillugit nutaamik aaqqissuusseqqinnermut ilanngunneqarnissaannik, kingusinnerpaamik UKA 2021 nallertinnagu inatsisissanik Naalakkersuisut saqqummiusseqqullugit peqqunneqarnissaannik Inatsisartut aalajangiiffigisassaattut siunnersuut

Taamaammat ikiorsiissutinut tunngatillugu inatsimmi equngasoqarsimanera piaarnerpaamik iluarsivigineqartariaqarnera Inuit Ataqatigiit sinnerlugit piumasaraarput, misissuisoqartariaqanngilaq, sivisunerusumik utaqqisoqartariaqanngilaq napparsimasummi kikkulluunniit misissuinissamut, sivisunerusumilluunniit utaqqinissamut periarfissaqanngillat.

Mariane Paviasen  
Inuit ataqatigiit.